



Sud Bosne i Hercegovine
Суд Босне и Херцеговине

Broj: S1 3 Iž 043488 22 Iž
Sarajevo, 11.08.2022. godine

Sud Bosne i Hercegovine, u vijeću Apelacionog odijeljenja sastavljenom od sudija Zvezdane Antonović, kao predsjednika vijeća, Dinke Bešlagić-Čovrk i Mirka Božovića, kao članova vijeća, odlučujući o žalbi Zuhdije Oraščanina, ..., A., izjavljenoj protiv Odluke Centralne izborne komisije Bosne i Hercegovine broj: 06-1-07-1-608-3/22 od 04.08.2022. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine, u nejavnoj sjednici, održanoj dana 11.08.2022. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine po podnesenim prijavama do 19.07.2022. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što potpis na prijavnom obrascu ne odgovara potpisu na identifikacionom dokumentu.

Žalitelj je protiv navedene odluke blagovremeno izjavio žalbu navodeći da je njegova prijava za glasanje izvan Bosne i Hercegovine odbijena iz razloga što prijavni obrazac nije ispravan. Ističe da su svi podaci navedeni u obrascu ispravni, da je obrazac čitko ispunjen i da je potpisan identično kao na identifikacionom dokumentu. Moli da se njegova žalba uvaži i da mu se omogući učestvovanje na izborima.

Centralna izborna komisija Bosne i Hercegovine je dostavila ovom sudu odgovor na žalbu u kojem predlaže da se izjavljena žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave Zuhdije Oraščanina za glasanje izvan BiH dostavljene dana 12.07.2022. godine, pravilno uočila da se potpis na prijavi očigledno razlikuje od potpisa na identifikacionom dokumentu koji je priložen uz prijavu. Dakle, žalitelj nije stavio svojeručni potpis identičan potpisu na identifikacionom dokumentu, zbog čega izgled i sadržaj obrasca nisu u skladu sa Uputstvom o postupku slanja, prijema, obrade, arhiviranja i zaštite elektronskih prijava državljana BiH za glasanje izvan BiH elektronskim putem („Službeni glasnik BiH“ broj:27/22).

Postupajući na način opisan u prednje utvrđenom činjeničnom stanju, podnositelj žalbe je postupio suprotno odredbi člana 3.15 stav (1) Izbornog zakona BiH („Službeni glasnik BiH“, broj 23/01 do 51/22), kojom je propisano da državljanin BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

Centralna izborna komisija BiH je u skladu sa članom 3.15 stav 1. Izbornog zakona BiH odredila rok do 19.07.2022. godine u 24,00 sata za prijem prijave za upis u birača u izvod iz Centralnog biračkog spiska za glasanje izvan BiH za Opće izbore 2022. godine. Žalitelj je imao mogućnost da putem internet stranice i info linije Centralne izborne komisije BiH se informiše o statusu njegove prijave koju je poslao 12.07.2020. godine i na taj način otkloni nedostatak koji se ogleda u činjenici da njegov potpis na prijavnom obrascu ne odgovara potpisu na identifikacionom dokumentu.

Osim toga, žalitelj je propustio da otkloni nedostatke u ostavljenom roku od dva dana ni nakon poslane obavijesti od 18.07.2022. godine putem e-maila.

Napomene radi, žalitelju nije oduzeto biračko pravo za Opće izbore 2022. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA
S U D I J A
Zvezdana Antonović